



PDKÎ Baykota Nû Ya Amerîkayê Bi Kiryarek Jêhatî Dizane



Piştî wê ku DYA'ê li helwest û kiryarek bêminak de 8 kes ji berpirsiyarên payebilind
yên Komara Îslamî ji ber pêpeskirina mafên mirovan tehrîm, û sefer û dan û
standinên aborî û malî yên wan li Amerîkayê de jî qedexe kir, pêlên keyfxweşiya
azadîxwazan û alîgirên mafên mirov li Îran û cîhanê li dûre hat. PDKÎ di
daxuyaniyekê de pêşwazî ji wê helwesta Amerîkayê kir...

R: 7

Hesen Şerefî:
“Ew karê qirêj
di encam de
dê her rûreşî û
bêsermiyê ji
bo
encamderên
wê re bihêle”

R.3



Rûpel 2



Daxuyaniya Kongireya
Netewên Îrana Federal...

Rûpel 5



Dengê Nivîskaran

Ebdulla Hicab

Rûpel 7



Teknîka Dubare A Rêberiya
Îranê...

Arîn

Rûpel 9



Gelaleya Perlemana ..

Şerîf Felah

Daxuyaniya Kongireya Netewên Îrana Federal, Derheq Şermezarkirina Siyasetên Dijî Ziman û Çandî A Rejîma Îranê

Kongireya Netewên Îrana Federal, bi hinceta 23'ê Îlonê û vekirina xwendîngehan, bi derkirina daxuyaniyekê siyasetên dijî çandî û jinavnbirina zimanê netewên ne Fars di Îranê de ji aliyê desthilatê ve şermizar kir. Deqa vê daxuyaniyê bi vî awayî ye:

Roja 23'ê Îlona her salê li Îranê, di rastî de, roja çûna zarokan ji çanda (ziman û olî) ligel evîn û xoşewîstiya malbat û civakê bo çanda 86 salî a zal, fermî û qurixkirî a civaka Îranê ye.

Hînkirin û xwendina destpêkî ger hevterîb tevî çanda malbat û derdor û leyîstokên zarokan be, mijara fêrkirina nîşaneyê xwendinê (tîpên dengdar û tîpên bêdeng) û fêrbûna xwendin û nivîsina zarokan bi zimanê zikmakî ê xwe de ku peyvên jî bi başî dinasin, şiyân û karînen veşartî ên zarokan ku samana rastî û garantiya paşeroja her netewe û welatekê ye, dipişkivîne.

Bi qewlê Seidî Şirazî, (dersê moellêm ger bûd zemzemêyê mohebbetî, comîê bê mekteb awered têflê gorîzpay ra), lê zarokên ku çanda (ziman û ol) a malbatî û civakiya wan tevî çanda fermî û qorixkirî a zal cuda be, û roja çûn bo xwendîngê tevî kesên weke (rêveber, nazim, mamosta) berbirû dibin ku li cihê waneya xoşewîyê, bi hêmayê zorgotînê û ziman nezanîne (wate zimanê dayîkê zarokan) xwe derbixin, rewş û seqaya fêrbûnê bo zarokan, cihê xwe cihek têkel bi dubendî û tundûtûjiya di navbera zarok û mamostayan dide. Bi vî awayî xwendîngê bo zarokan dibe îşkencegeh û nîşaneyê xwendinê cihê xwe bi hînbûna zimanekî din û fêrbûn li rûyê dengên zimanekî nediyar dide ku tevî malbat û cihê yariyan û jiyana zarok û civaka wî bi tevahî nenas e.

Siroştî ye ku zarokên han hevrîşê lerezokiya kesayetî û bêhîbarî û bêbawerîya çanda malbatî û netewî a xwe dibin. Encama perwerdeyek wiha pirr ji tund û tûjî û dîktatorperwerî, yan dê bibe sedema asimilasyon qutabî yan jî bi berhevdan li gel desthilatdarî û fermîbûna sîstema yek kultor, yek ziman û yek olî a nihoyî, ew qutabî temenekê li gel hestkirin bi gunehê nekîrî li nav xelkek bi ziman, çand û mesebê nefermî bi xwexoriyê ve diborînin. Yan li baştirîn halet de li dijî hovîtiya eşkere ya siyasî- çandî, anku pawanxwaziya zimanî- dînî a zal, yaxî dibin û ji bo cihgîrkirina demokrasîyê li rex azadîxwazan de bêhewl namînin. Xebat li dijî zimankujîyê ku şîbî çandkujî û nifşkujîya hêdî û liserxwe ya netewên akincî li Îranê ye, erkê her mirovek xwedî şaristanîyê û azadîxwaz e. Em li Kongireya Netewên Îrana Federal de dê dirêjederê riya xwe bin û erkên mirovî û wijdanî yên xwe dê bicî bigehînin. Lê em çavniheriya hevrêtiya kesatiyên azadîxwaz û azadbîrên fars bona tevîbûna bi bizava fermîbûna perwerdeya zarokan bi zimanê zikmakî li Îranê de û wêdebirina vî sivikatiya 86 salî a zimankujî û dijî çandî li berçêla Îranê û netewa fars in.

Kongireya Netewên Îrana Federal



Daxuyaniya Kongireya Netewên Îrana Federal derheq teqîna li bajarê Mehabadê

Kongireya Netewên Îranê Federal bi derkirina daxuyaniyekê, bûyera teqandina bombeyê li bajarê mehabadê û kuştin û birîndarkirina dehan kes ji xelkê wî bajarî şermezarkir û behî û serxweşî ji malbatên goriyan kir. Deqa vê daxuyaniyê bi vî awayî ye:

Roja 22'ê Îlona 2010'an terorîzma kor vê carê li bajarê Mehabadê bi teqandina bombeyê di nav temaşavenan de ku pîrraniya wan jin û zarok bûn, cinayeteke bitirs û xof afirand.

Kongireya Netewên Îrana Federal, serbarê nîşandana xema xwe derheq kuştina wan welatîyên bêtawan û ragihandina behî û serxweşîya xwe ji malbatên wan, her terze kiriyareke terorîstî ji aliyê her kesekê be, bi tundî şermezarkir dîke.

- Çi terorîzma kor a dijberên rejîma terorîstperwer a Îranê li hundir û derve be û çî terorîzma dewletî a Komara Îslamî be ku di heyamê desthilatdariya xwe de bi rêberîya du weliyên Feqîh (Xumeynî û Xameneyî) rekurdarê kuştinê di dîroka 30 salî a hevçerx a Îran û cîhanê de ye.

Li cinayeta sînema Rêksa Abadanê, fetwaya kuştina bikom li kurdistanê, cinayeta bixof a Turkemen Sehrayê, Azerbaycan, Ehwaz (Xozistan), Belûçistan, Qeşqayîyan... bigire heya digihîje kuştina girtiyên siyasî ên dehsala 60'an ku xincî rehî û girtî li çengên rejîma xwînmij a paremayî a Komara Îslamî a Îranê, tişteke nebûn.

Kuştin û îşkencekirina berdeyam a cudahizran ji dîndaran û xeyrî dîndaran ji wan: Sunnî, Yarsan, Behayî, Babî, Sobî û Derwêş û... kuştin, tepeserkirin, îşkencekirin û destdirêjiyên seksî li girtîgeha Kehrîzekê, tevahiya wan, curek terorîzma dewleta rêxistinîye ku bo pêkanîna tirs û xofê û bêdengkirina bizav û xweragiriya neraziyan di nav xelkê de birêve diçe.

Kongireya Netewên Îrana Federal hêvîdar e ku bi hişyariya xelkê agah û çeleng ê bajarê mehabadê, sedema rastiya vê terorîzma kore wek sedema rastiya Sînema Rêksa Abadanê, bi netewa kurd û netewên din ên Îranê û xelkê akinciyê Îranê û herwiha bi xelkê cîhanê binasînin heya ku zemîne û derfeta dadgeha adilane di pêşerojêke nizk de pêk bihê.

Kongireya Netewên Îrana Federal



Peyama Pîrozbahîya Sekreterê Giştî Ê PDKÎ Bo Serokê Nû Ê Partiya Kar a Welatê Brîtanyayê

Rêzdar "Ed Miliband"

Ez agehdar bûm ku roja 25'ê Îlona 2010'an, di kongireya Partiya Kar de cenabê te bi Serokê nû yê partiyê hatin hilbijartin.

Bi vê hilkevîte ez kêfxweşîya xwe nîşan didim û ji aliyê xwe û hemû rêberîya PDKÎ ve pîrozbahîyê li te dikim.

Bi vê hêviyê ku di bin rêberîya we de, peywendiyên dostane di navbera Partiya kar a Brîtanîya ê û partiya Demokrat a Kurdistana Îranê (PDKÎ) de bihêztir û berfirehtir be.

Tevî gerimtirîn slavan û hêviya serkevtinê ji bo we.

Partiya Demokrat a Kurdistana Îranê
Sekreterê giştî Mistefa Hicrî
26'ê Îlona 2010'an a Zayîn

Di Pêwendî Tevî Jidest Çûna Hunermendekî Şoreşger De

Koça dawîya Heme Ceza, hunermendî xweştevî û naskirî ê warê hunera resen, ciyê xem û kovana me hemûyan e.

Hunermend Heme Ceza, hunermendê şoreşger bû ku di heyamê temenê xwe de ji bilî vê yekê ku gellek salan wek pêşmergeyek bona serbestiya gelê xwe di borxwedanê de bû, xizmeteke zaf jî bi hunera resen û şoreşvaniya kurd kir û di vî derheqê de cîdestê wî diyar e.

Bi vê hincetê behî û serxweşiyê ji malbata vî hunermendî û hemû têkoşerên warê hunera resen a kurd û hunerdostan dikin û hêvî dikin ruha wî bi biheştê berîn şad be.

Partiya Demokrat A Kurdistana Îranê
Sekreterê Giştî Mistefa Hicrî

Peyama Pîrozbahîya Sekreterê Giştî Ê PDKÎ Bi Hinceta Endambûna Çend Kurdan Di Parlemantoya Welatê Swêdê De

Birêzan:

**Şadiye Heyderî.
Amîne kakebawe.
Roje Hîdîn.
Cebar Emîn.
Îsmail Kamilî.**

Endamên nûhilbijartî bo Parlemantoya Swêdê.

Bo me cihê kêfxweşî û serbilindiyê ye ku hûn komek ji xwişk û birayên kurd ên me li welatê Swêdê serbarê pirsgrîrêkên koçberiyê, we kariye bi kar û tekoşînê bibin cihê bawerîya xelkê li cihên cuda cuda ên wî welatî bi kurd û Swêdî ve, di encam de, di kêbirkêya hilbijartinan de serkevîneke berbiçav bi dest bixin.

Em bi vê hincetê pîrozbahîyê ji we û hemû kurdên akinciyên Swêdê dikin.

Hevalno!

Serbarê vê yekê ku her yek ji we berbajarê yek ji partiyên Swêdê bûn ku cudahî tevî hev hene, lê çavnehîriya vê yekê ji we tê kirin ku bi yekdemî bikarin pîrsa kurd bi awayekî bibandor di parlemantoyê de bixin rojevê.

Di vî erkê girîng de ku ketiye ser milê we, hêviya serkevîneke ji we re dixwazim.

Partiya Demokrat a Kurdistanê Îranê
Sekreterê giştî
Mistefa Hicri
27'ê Îlona 2010'an a Zayînî
5'ê Rezbera 1389an a Rojî



Hesen Şerefî: Ew kiryar bi qasî ku ji bo hemû aliyekê bijan bû, ewqas jî ji kar û kiryar û pîrensîpên Kurdan bi dîr e

Roja Çarşemî, 31 ê Xermananê di dema birêvebirina rê û resma bîranîna yekem roja destpêkirina

şerê Îran - Îraqê ku Komara Îslamî bi hefteya "Difai Muqedes" binav kiriye, li bajarê Mehabadê û di nav jin û zarokên ku ji bo temaşekirîna hatibûn, bombeyek teqîya û bû sedema kuştina 12 kes û birîndar bûna dehan kesên din ku pîrîniya wan jin û zarok bûn. Berpîrsên rejîmê hevdem digel teqînê bi bê yek û du di axaftin û derbirînen cuda cuda û jihev nakok de tiliya tometbariyê bo aliyê Partiyên dijber ên Kurdistanî dirêj kir û ew kar bi pilana Amerîka, Îsraîl û Partiya Beis dan zanîn.

Ew teqîn, cihê teqînê û helwesta rejîmê di wî warî de pîrsiyarên zaf bo xelkê Kurdistanê, partiyên Kurdistanî bi giştî û xelkê Mehabadê bi taybetî pêş anîye. Bo bersiva wan pîrsan û şiroveyên pêtir li ser wê mijarê, me hevpeyvînek taybet ligel birêz Hesen Şerefî, Cihgirê Sekreterê Giştî yê Partiya Demokrat a Kurdistanê Îranê pêk anîye ku em bala we xwandewanên hêja jêre radîkşînin.

Piştî teqîna li Mehabadê, di cih de opozîsyona Komara Îslamî ji aliyê berpîrsên rejîmê ve hat tometbarkirin, eve di halekê de ye ku di dîroka xebata wan Partiyên de tucar nebûye û nehatiye dîtin ku ev Partiyane bo gihîştin bi armancên xwe, dest bo teqînewe û danîna bombeyan biribin, hûn wê bilez tometbarkirina Partiyên Kurdistanî ji bo çi vedigerînin?

Teqîna li bajarê Mehabadê bûyerek



nexweş û bijan bû ku mixabin di wê bûyerê de dehan kes hatin kuştin û birîndar kirin, ew kiryar bi qasî ku ji bo hemû aliyekê bijan bû, ewqas jî ji kar û kiryar û pîrensîpên Kurdan jî bi dîr e. Her wek te bixwe jî amaje pê kir, gelê Kurd di xerabtirîn zirûfa xebatê de jî pena bo wan cure karên qirêj nebiriye, herçend bixwe zaf caran bûye goriyê wan karên neşayist û nerewa.

Ewa ku rejîm jî tiliya tometbariyê ji bo ev û ew dirêj dike, tiştê teze nîne. Eva ji taybetmendiyên Komara Îslamî a Îranê ye ku di rewşên wiha de bi bê vekolîn, bê fakt û bi bê sedem di cih de dujminên derekî yan opozîsyona Kurd yan Îranî tometbar dike û ecêb jî eve her dema ku bi degmen di rewşek wiha taybetî de vekolîn yan lêpîrsîn ji wan cure bûyeran kiriye,

nerastiya wan tometan derketiye.

Mehkûmkirina wê cîneyetê ku derheq jin û zarokan hat kirin, ji aliyê Partiya Demokrat a Kurdistanê Îranê û partiyên din ên Kurdî, karek di cihê xwe de û dirust bû ku digel pîrensîp û bawerîyan wan hev digre û karek zaf asayî û heta erkê ser milên wan bû. Ez hez dikim ku vê yekê jî di bersiva pîrsa we de zêde bikim ku lezkirina rejîmê ji tometbarkirina aliyan vedigere bo bernamaya mifah standina rejîmê ji wê bûyerê, ji berku pêtir mîltarîze kirina deverê û ewlehîkirina deverên Kurdistanê û di kêleka wê yekê jî dubendî pêkanîn di navbera xelkê de û afirandina seqayek bêbawerî û pêşgirî ji yekgirtina pêtir a xelkê, ji armancên rejîmê ne.

Ji çend salên dawî de bi awayekê di nav hêzên çekdar ên rejîmê de

helverîn dest pêkiriye ku bêguman daxuyaniya berê ya Partiya Demokrat a Kurdistanê Îranê jî ku bas ji lêborînê ji wan kesan dike, kartêkeriyek berbiçav di xurtbûna pêvajoya helverîne hebûye, gelo ew teqîne dikare mebesteke wa di pişt de be ku bixwaze pêşî ji wê pêvajoyê bigre. Wate çekdarên Mengur bine ser vê bawerê ku venegerin himbêza xelkê û weke çekdarên rejîmê bimînin?

Helverîn di nav refên çekdarên rejîmê de bi taybetî di wan yek du salên derbazbûyî de tiştêk çavniherkirî bû. Çimku ew çekdar pêtir tevî rejîmê û dezgehên tepeserker in û ji nîzik ve dibînin ku çawan pîlanên bo xelkê dadirêjin û çawan çibîcî dikin û gellek caran jî wan çekdaran jî tevî pîlanên xwe dikin. Lewra wan baştir rejîm nas kiriye û naxwazin ji wê çendê pêtir beşdarî wan cîna yetan bibin ku rejîm û hêzên wê li hember xelkê dikin. Ji aliyek din ve jî asoya temen û mana vê rejîmê bi wan hemû nerazîtiyan ku xelkê ji rejîmê heye, ew rewşa aloz ku rejîmê bo xelkê afirandiye, xul û tarî dibê û naxwazin çarenivîsa xwe heya dawî bi çarenivîsa rejîmê ve girê bidin. Bila ewê jî bêjim ku helverîn tenê taybet bi hêzên çekdar nine, belkî aliyên din jî di nav dem û dezgehên rejîmê de vegirtiye. Her di wan yek du mehên dawî de me dît ku çend kes jî berpirsên rejîmê di Balyûzaxneya wê rejîmê li welatê Finland, Norwey û Bîljîkê de dest ji karê xwe vekişandin û nerazîtiya xwe li himber siyaseta û kiryarên rejîmê derbirin. Her di wê peywendiyê de, eşkera ye ku helwîsta Partiya Demokrat a Kurdistanê Îranê di radeya xwe de bibandor û kartêker bûye. Guman tune ye ku rejîm di çarçoveya mifah standin ji bûyera Mehabadê û pilangêrî bo wê mebesta ku min amaje pê kir, hewil dide.

Xebata sivil her di destpêka hatine ser kara rejîma Îslamî ve heya niha aliyeke berbiçav ji xebata xelkê Kurdistanê bûye ku beşek zaf ji karin û şiyana zeynî û eynî a vê netewê ji bo wê şeweya xebatê hatiye terxankirin û di wê riyê de jî goriyên zaf dane, diyare piştî Kongireya 14an a Partiya Demokrat a Kurdistanê Îranê û pejirandina dirûşma "bixelkîr kirina xebatê" di wê Kongireyê de, bandora şewexebata han zeqîr bûye û li ser deverên din ên Îranê jî bandorek zaf çêkiriye û heta kariye bala zaf ji karnasên derve û biyanî jî bo aliyê xwe rakêşe: Pirsyar eve, gelo tawanbarkirina opozîsyona Kurd û dirêjkirina tiliya tawanbarkirinê bo aliyê hêzên Kurdî dikare ew rûçikê geş yê sivil tûşî çirijînê

bike, bi taybetî ku ew teqîne di Mehabadê de rû da?

Xebata sivil û her şeweya xebatekê din her yek di dema xwe de di bizava Kurdî Kurdistanê Îranê de bandorek taybet bi xwe hebûye. Bi xelkîkirina xebatê hertim li ber çav û di destûra karê Partiya Demokrat a Kurdistanê Îranê de bûye, lê di Kongireya 14 ê pêde, pêdagirî û girîngiyek pêtir pê hatiye dayîn û bandora wê jî bi kiryar pêtir derketiye, rejîmê jî hertim hewil dade û rûçika Partiya Demokrat a Kurdistanê Îranê bi her cure xebatekê ve bişewîne bike û berevajî nîşan bide, lê 65 sal xebata berdeyam a vê Partiyê bi rûçikê demokratîk û geş yê wê tucar rê nedaye ku ew hewlên rejîmê bi akam bigîjin. Xêncî wê, Partiya Demokrat a Kurdistanê Îranê bi hemû taybetmendiyên xwe ve bo xelkê Kurdistanê û heta bo zaf ji hêz û aliyên siyasî ên Îranê û derekî jî, ji wê çendê naskirîtir e ku Komara Îslamî bikare bi curek din bixwe ber çav yan bide nasîn. Renge di wê derbarê de jî ku te bixwe îşare pê kir, dîsan hewlên xwe bide, lê ez xatircem û piştrast im ku dîsan hewla wê dê nezok bimîne.

Encama wan karan dê bigije kur, gelo dê bikare bi wan şîwe kiryanan yekrêziya xelkê Kurd tûşî cudabûn û jihev veqetiyane bike?

Ew karên qirêj di encam de dê her bêşermiyê ji bo encamderên wê bihêle. Hewlên rejîmê jî bo pilangêrî û dubendî pêkanî û tevlihevîkirina yek rêziya xelkê Kurd hertim li rojevê de bûye, lê herwek heya niha nekariye meremên rejîmê bi cih bîne, di wê peywendiyê de jî dê her wusa be. Bi taybet ku niha xelkê zaf baştir ji berê rejîm nas kirine û baş ji pilangêrî û bernameyên dijîgelî ên wê agehdar in.

Erkê xelkê Kurdistanê li hember wan şeweya kiryanane çiya û helwesta Partiyên gerek çawan be?

Xelkê Kurdistanê erkê esasî yê xwe ku xebata dijî rejîma kevneperest û dijî insanî a Komara Îslamî ye, baş nas dikin û baş dizanin û di wê peywendiyê de jî bi xwîn û gorîkirin û bi fidakariyên kêmwêne ew erkê pîroz bi encam gihandine, li hember wan şîwe kiryanane de jî pêwîste bi aramî û dilfirehî ve riftarê bikin û hewil bidin pîlanên rejîmê û hewlên dem û dezgehên tepeserker ên wê ji bo mifahstandin ji wê bûyerê pûç bikin. Helwesta Partiyên Kurdî dibê herwek derbazbûyî pêdagirî û xurtbûn li ser maf û azadiyên netewa Kurd li Kurdistanê Îranê be û li peywendî digel wan cure bûyeran de jî her wa li ser hest bin û bi helwestên xwe ên dirust pêşî ji pilana mifahstandina rejîmê ji wan kiryarên qirêj bigrin.

Sefera Ehmedînijad bo Lubnanê, destpêkek ji bo aloziyên Li wî welatî

Dara Natiq

Sefera li pêşberî serkomarê Îranê bo welatê Lubnanê li 13ê Çiriya pêşîn bûye cihê nigeranî û gengeşeya navbera aliyên siyasî yê Lubnanê û herwusa raya giştî a cîhanê û nemaze Amerîka û Îsraîlê.

Li gor rapora navenda Amerîkayê a bi navê "Hidson Niyoyork" Hizbulah û Îranê qazanc û berjewendiyên hevpar di pêkanîna alozî û tevlihev kirina rewş u zirûfa siyasî a Rojhilata Navîn de hene. Vê raporê herwisan daye eyanê ku Hizbulah bi harîkariya Îranê dixwaz ku bi derbeya leşkirî û afirandina kudetayekî li dijî dewleta henoke a Lubnanê raya giştî derheq bi rola wê hizbê di terora Refîq Herîrî a di sala 2005'an de bixapîne. Ewa di halekê de ye ku biryar e di demek nîzik de dadgeha navneteweyî a taybet bi dosiyeya terora Refîq Herîrî di ragehandina zaniyariyên destpêkî ên vekolîna xwe de bo raya giştî hin rayedar û kesên ser bi Hizbulahê di encamdana wê kiryarê de bide eşkere kirin. Lê Hizbulaha Lubnanê jî bi awayekî tund tevî dadgeha navneteweyî dijberiyê dike û zext û givaşan dixwe ser dewleta Seid Herîrî heya ku jî dabînkirina wê bûdçeya ku biryar bû dewleta Lubnanê bo domandin û bi encam gehandna wê dadgehê bide, poşman bibe û ew dadgeh bihê sekinandin.

Ji aliyekî din ve Ehmedînijad ragehandiya ku ew dixwaze di dema sefera xwe bo wî welatî de seredana başûra Lubnanê anku xala tixûbê navbera Îsraîl û Lubnanê bike ku beriya du salan bo heyamê nîzik mehekê şerê navbera Îsraîl û Hizbulahê tede qewmî bû dixwaze û bo aliyê Îsraîlê kevîran bavêjê û hevpeymaniya xwe bi Hizbulahê re dubare bike. Lê ew sefere û biryara han ya serkomarê Îranê ne tenê bûye cihê nerazîbûna beşek berçav ji aliyên siyasî ên nava Lubnanê, ji berku bûye cihê nigeraniya Îsraîlê û hêzên nîzami yê welatî ku niha di amadebasiyek tewaw dane û xwe ji bo her cure kiryarekê li hember Hizbulahê de amade dikin. Lê li gor rapora han çûna Ehmedînijad bo wê deverê carek din yê bibe sedema alozî û azirandina herdu aliyên û nemaze dewleta Îsraîlê.

Nawenda "Hidson Niyoyorkê" herwisan di rapora xwe a derheq şirovekirina sefera Ehmedînijad bo Lubnanê de dibêje ku: Ehmedînijad bi awayekî micd pêşwaziyê ji wan bûyer û aloziyên ewlehî ku di nava axa Lubnanê û herêmê de diqewimin dike, ji berku aloziyên han di herêmê de bi qazancê piroseya domandna bernameyên etomî yê Îranê ye û raya giştî bi hebûna wan aloziyane hay ji piroseya han namîne û berqesd dixwazin raya giştî li ser bernameya navikî berxwar û bilarê de bibin.

Di hemem demê de Wezaretê Derve ya Amerîkayê roja Sêşemîya derbasbûyî bi awayekî fermî nigeraniya xwe derheq bi sefera Ehmedînijad bo Lubnanê da eyanê. Hîlarî Kilînton di dema hevdiîtina xwe bi Mîşl Silêman Serkomarê Lubnanê di perawêza kombûna giştî a Saziya Netewên hevdiîtî di heya borî de, bi hûrî nigeraniya Amerîkayê ji aliyên cur bi cur ên sefera Ehmedînijad bo Lubnanê da xuya kirin û jêre got ku pêwendiyên Îranê bi Hizbulahê re serbixweyî wî welatî dibê bin pirsyarê û ew yek bûye cihê nigeraniya Amerîkayê.

Lê sefera Ehmedînijad bo Lubnanê heya niha çend caran hatiye paşxistin û çawedêrên siyasî dibêjin ku sedema vê çendê vedigere ser vê yekê ku dewleta Seid Herîrî bi tawahî dijberê wê serdana serkomarê Îranê ye û Hizbulah jî bo encamdana wê seferê zext û givaşan dixwe ser dewletê.

RONÎ

Quncikek ji bo şiroveya bûyer û babetan ji xwendevanên "Agirî" re

Ebdulla Hicab



Dengê nivîskaran

Li rojên navbera 25-30 meha 9, kongireya 76 mîn ya PENA Navneteweyî li bajarê Tokyo

paytextê Japon, bi navnîşana "Jîngeh û Wêje; Peyiv dikrain çî bikin" birêve çû. Şandek 2 kesî ji PENA Kurd di nava wan 99 navendên PENên neteweyî ji welatên cuda de bû ku ji koma 144 PENên endam li PENA Navneteweyî di kongireya îsal de beşdar bû. Şandên beşdar mijarên girêdayî bi jîngeh, aştî, rewşa jinan, nivîskaran di girtîgehên de, ziman û werger û kar û xebata pêşeroje PENA Navneteweyî bi berfirehî anîne ber basê û hin ji şandan pêşniyarbirayê girêdayî bi dozên xwe weke birayê kongirê dane pejirandin.

Piştî mēvandariya vekirina kongirê ku ewareya roja 25.09 birêve çû, civîna fermî roja 26.09 bi axaftina mîvandare kongireyê, Serokê Navenda PENA Japon destpê kir. Xanuxwê di axaftina vekirina Kongireyê de hêvî xwest ku civîna îsal ji bo pêşxistin û xurtkirina armancên PENA Navneteweyî bibe alîkar. Rojeva kongireyê pir dagirtî bû, lê mijarên sereke ku ji her babetê pitir bandor li ser nîqaşan hebû bi bîrxistina erk û berpirsariya nivîskaran di civakê de û rola PENê di pêşvebirina aştî, wekhevî û pîvanên mafên mirovan de bû.

Di axaftina vekirina kongirê de, rêzdar John Ralston Saul, serokê PENA Navneteweyî giringî da bi rola nivîskaran di xurtkirina bîngeha azadiya bîr û ramanê de û weha got: "Werin em xwe nexapînin. Em di dewranekê de dijîn ku metirsiya li ser azadiya ra û ramanê, li ser azadiya wêjeyê û li ser kultûrên piçûk roj bi roj zêde dibe. Niha dema serhildana sistemek nû ya autorîter an deselatxwaz li cîhanê ye, demek ku t da pêlên nûye modela kevne zêdegaviyên neteweperistî an nasyonālîzmê birê ketiye, serhişkî û xapandina xelkê li her deverên cîhanê zêde dibe. Em li vir in, li Tokyo heya li ser navê ew kesên ku ji nivîskandin û axaftinê hatine bêpar kirin dengê xwe bikin yek û hawara xwe bi dengê wan re bilind bikin".

Nivîskarê xwedî berpirsariyê dengê kesên hatî bēdeng kirin e û divê li ser bîngeha wê berpirsariyê tev bigere. Armanca sereke ya PENA Navneteweyî jî ewe ku wê erkê bigre ser milê xwe û di wê çarçoveyê de gavan bawê. Lewma wê dema ku êş û elemên nivîskar û rojnamevanên Kurd di girtîgehên Komara Îslamî de, an banga aştîxwaziye gelê Kurd dikete rojeva PENA Navneteweyî, bi sedan nivîskaran dengê xwe bi hawara gelê Kurd re dikirin yek û

daxwaziya bi dawînanîna rewşa bindestiya Kurdistanê dikirin.

Sala 2010 her wisan hevber e digel 50 saliya damezirandina Komîteya PENA Navneteweyî ya Nivîskaran di girtîgehên de. Ji ber wê yekê civîna îsal giringiyek taybet da rewşa nivîskar û rojnamevanên girtî. Di civînê de êskere bû ku niha wê gavê PENA Navneteweyî ji bo parastina pitir ji 900 weşankar, nivîskaran weblogên internetê, sernivîskar û rojnamevanan li hermû deverên cîhanê kar dike. Di nava wan xebatkarên meydana wêje û nivîsê de gelek nivîskar û rojnamevanên Kurd hene ku PENA Navneteweyî bi hîmdarî û alîkariya Navenda PENA Kurd, bi baldariyek taybet ji bo azadiya wan kar dike. Di wê çarçoveyê de rewşa îro ya girtiyên doza Kurd Muhemed Sidîq Kebûdwend, Bêhzad Kurdistanî, Muherem Erbay û gelek nivîskaran Kurd di girtîgehên Îran û Turkiyê de bi caran kete rojeva Kongireyê û nîqaş li ser hate kirin.

Ji wê bi der, dîtîna û ramana mamostayê şehîd, Ferzad Kemanger li ser aştîyê ku ji nameya wî ya dawî di derbarê hêviyên aştîyê de hatibû girtin, weke sembola hêviyên gelê Kurd ji bo aştî û jiyana azad bi ser atmosfera kongireyê de bandorek giring danî. Heza Ferzad ji bo jiyana, hêviyên wî ji bo pêşerojê, jiyana dîr ji tirs û duçavkiyê ku wî hêvî dikir, her yekê bi şêweyekê bandor danibû ser her yek ji delegeyên beşdar di komîteya aştî ya PENA Navneteweyî de.

Li ser daxwaza PENA Kurd, civîna nivîskaran cîhanê li Tokyo banga çareseriyê aştîyaneyê pîrsa Kurd li Îran û Turkiyê kir û pêvajoya ku niha gelê Kurd li Başûrê Kurdistanê û Îraqê destpê kiriyê weke mînak ji bo çareseriyê pîrsa Kurd li welatên din anî ziman. Di wê çarçoveyê de bi dawîhatina şer û guhertina zêhnîyeta şerxwaz weke pêwîstiyek henokeyî di rîya çareseriyê de bi pêwîst hate zanîn. Di heman demê de PENA Navneteweyî pêşniyara PENA Kurd di cî de dît ku daxwaz dike ji bo vedîtina rîya çareseriyê pêwîste hemû aliyên beşdar di şerê Kurdistanê de bi pêşengî xebata gelê Kurd li her yek ji beşên Kurdistanê re bikevin diyaloga cidî ya çareseriyê. Her çend li gor dîtina PENA Kurd ew yek ji bo çareserkirina pîrsa Kurd li Îranê di çarçoveya rêjîma îro ya Îranê de mumkin nîne.

Kongireya PENA Navneteweyî her wisan giringî da xebata ji bo avakirin û bi pêşxistinê civaka sivil, parastina pîvanên mafê mirovan û yasaya navneteweyî li

Kurdistanê, û ew pîvan weke bîngeh ji bo xurtkirina bîngeha aştîyê binav kir. Piştî Komîteya Aştîya PENA Navneteweyî biryar da ku mijara aştî li Kurdistanê bixwe rojeva sereke ya xwe û di dema pêş de bi cidî ji bo bîcîh kirina aştî li Kurdistanê kar bike. Di wê çarçoveyê de hêvî tê kirin ku civîna heyva Gulana sala 2011 ya Komîteya Aştîyê zêdetir pîlan û projeyên wê komîteyê ji bo aştîyê zelal bike.

Xêncî rewşa şer û aştî û ya rewşenbîrên girtî li ser doza siyasiyê Kurd, mijara ziman û wêjeya Kurdî jî di rojeva kongireya PENA Navneteweyî de bû. Di wê çarçoveyê de PENA Kurd ew dîtîna da zelal kirin ku bikaranîna têgeha zimanê "kêmenetewe" ji bo zimanê Kurdî xedreke dîrokî û şaşitiyek zanistî ye. Ji ber ku nabe tu gel weke kêmenetewe û tu ziman weke zimanê kêmeneteweyan bê nasandin. Zimanê Kurdî zimanê Gelê Kurde ku xwediyê welatê xwe, dîrok û kultûra xwe ye. Bi wê dîtîne, şaş e ger aliyek an kesek zimanê Kurdî weke zimanê "kêmenetewe" binav bike. Weke çawan ku zimanên Îtalî, Feranseî û Almanî li Swîsê, zimanê Feranseî li herêma Quebec li Kanada, zimanê Aborigîniyan li Australia û zimanê "Samî" li Norwêj weke zimanê kêmeneteweyan nayê temaşê kirin, zimanê Kurdî jî li Kurdistanê zimanê kêmeneteweya Kurd nîne, çunkî Kurd jî kêmenetewe nîne.

Li ser bîngeha wan dîtînan, şanda PENA Kurd basî daxwaz û hêviyên Kurdan ji PENA Navneteweyî û ji nivîskaran cîhanê kir û daxwaz kir ku piştgiriya bidin pêşniyara ku mafê perwerdeya bi zimanê dayîkê weke mafê mirov dihesibîne. Pêşniyara şanda Kurd ya ku bi fermî naskirina "Mafê perwerde bi zimanê dayk li ser axa xwe" di çarçoveya yasayên navneteweyî û li jêr sîvana Neteweyên Yekgirtî de bê pejirandin, bi piştgiriyek berfirek kete rojeva karê PENA Navneteweyî û biryar hate dan ku ji niha û pêve PENA Navneteweyî li ser wê mijarê bi cidî kar bike.

Bi wan hemû hewl û pêngavên erênî û dilxweşkera PENA Navneteweyî û sozên bi dehan nivîskaran ji bo piştgiriya doza Kurd re, erka xwediyê dozê ji ya her kesî zêdetir e. Weke çawan ku hebûna şanda PENA Kurd ji bo pêşvebirina daxwazên nivîskaran Kurd çarenûssaz bû, ji bo pêşerojê jî barê girane xebat di wê çarçoveyê de her li ser milê nivîskaran Kurd bi xwe ye. Xebatek hevgerî di çarçoveya sazîyên neteweyî de, wê cî û giringiya nivîskaran Kurd di çarçoveya sazîyên navneteweyî de hê xurttir bike. Ew yek dikare ji bo bîdestxistina destketên hê baştir alîkar be.

Li jêr sîbera darên wezaretê de

M. Şucaî

Heyameke ku seba jîdestdayîna dostên hêja ên wek Dr. Qasimlo û Dr. Şerefkendî, dilê min gellek girtî

ye. Serbarê derbasbûna bi roj û salan jî bi ser vê bûyerê, dîsan jî mirov êş û azarê dikşîne. Lê em ji bilî domandina rîya xebatê dikarin çî bikin?

Herçend ku teji kirina cihê wan hêjayan gellekî zehmet bûye û niha jî her zehmet e, lê kêfxweş im ku hevalên PDKÎ, şîyan vê riyê bidomînin.

Ez li payîza sala 1345'an li jêr sîbera darên Wezaretê Perwerdê a Îranê de tevî Dr. Sadiq nasiyar bûm. Wê demê ez û yek ji dosên xwe li bajarêkê li Loristanê ve bo Îranşar û Xamişê hatibûne sirgûnkirin. Seba vê yekê min li cem dozgeriyê bi dijî serokê Îdareya perwerdê doz vekir, Sawak jî razî bi vê yekê nebû. Helbet em amade nebûn ku vî hukmî derheq dûrxistina me birêve bibin. Wê demê Dr. Sadiq û çend kesên din ji Mehabadê ve bo Erakê hatibûne dûrxistin. Wan jî serdana wezaretê dikir û bibûne mêhvanên li jê daran. Serokê pêşîn ê Îdareya perwerdê ê bajarê me ku yek ji dostên Bethayî, berpirsyarê giştî ê karûbarên karguzîniyê û birayê wî jî berpirsê giştî ê karûbarên Kurdistanê bû, piştevanî ji me kir û ew yek jî bû sedem ku Bethayî îzin ji me re wergirt ku em herne Kurdistanê, û Dr. Şerefkendî jî em bi hevalên xwe ên Kuristanê dane nasandin. Em çûne wê herêmê û her ji salên yekemîn de em ketne hizra damezirandina kilûpeke şetrencê li nawenda kulturî de. Dersxwanên li wê herêmê de gellek zû bûne hogirê şetrencê û roj bi rojê hejmara wan zêde dibû. Vê carê jî li ser biryara SAWAK, li dawiya sala xwendina 45-46'ê em bo Teheranê hatne dûrxistin. Vê carê jî em tevî hinek hevalên din wek Ceifer S, li Erakê de nasyar bûn, lê têkiliyên me bi Dr. Şerefkendî re her berdewam bûn. Cara daviyê ez û Dr. Sadiq Şerefkendî her du jî bûne berpirsyarê zanîngeha bilind (zanîngeha Terbiyet Moelim). Li wê serdemê de hevaletiya me gellek xweş bû. Piştînivroya hemû rojên çarşemiyên em bi grûpekî 20-30 kesî ji hevalên xwe ên wek Hemîd Musediq û gellek caran Dr. Sadiq, li kafeya 101'ê a şeqama Pehlewî li berbirûyê sînema Atlantîk li dewra yektir dicivyan û mijûl axavtina û vexwarinê dibûn. Di nav van axavtina de carna pirsên siyasî jî me bas dikirin. Dr. Şerefkendî pitir bas ji otonomiya ji bo Kurdistanê û demokrasiya ji bo Îranê û xebata li nav refên PDKÎ de dikir. Bîr û baweriya me her du kesan jî ku çepî bû, gellek nêzî hevûdin bû. Wê demê Dr. Sadiq ez han dam ku di cihê zimanê Îngilîzî de, ez her dem Firansyê bo hînbûna zimanê firansî, ku min jî ev yek qebûl kir.

Dr. Sadiq sala 1973'an çû Fransayê û piştê ji min re jî vîza wergirt û ez jî salekê piştê çûme Firansyê. Wî li balafîrxaneyê Urî pêşwazî ji min kir. Roja din ku yekşemî bû, wî ez birme Cimata Pîrlaşizê, û li wir de me bejna xwe bo Sadiq Hidayet û Muhendis Rezewî û ...tevand.

Wê demê bi tu awayî min nedizani ku ew

dostatiya û ew hevûdîna me li vê cimâtê de yê bibe hevûdîna hertimî.

Dr. Sadiq li dostatiyê de mirovekî mezin û li ber dilan, û li siyasê de jî kesekî birmend û hevlekî zor nêzik bû. Ew li sala 1976'ê û ez jî sala 1977'ê piştî wergirtina pileya dukturayê em vegeryane Îranê û em li zanîngeha Terbiyet Moelim de hatne damezrandin. Li serdemê herî aloz ên berî şoreşê de berdewam me bas li siyasê dikir û me ji bo avakirina saziya netewî a zanîngehan tayê zanîngeha Terbiyet Moelimê me hewil dida. Dr. Sadiq, Dr. Qasimlo û heta ez jî li ser vê baweriyê bûm ku dibe derfet bi Şapûr Bextiyar bihête dan daku deshilatekî xelkî çihgir biket û kadroyên şoreşê jî baş perwerde bin, hekî ne em ber bi deshilatekî mesebî ve diçin. Min bas ji şoreşê û avakirina rêkxirawên netewî ên zanîngehan ku çavkaniya girevên heftiya Wehdetê bûn kir, niha jî ez dixwazim ku bas ji bûyerekek bikim ku ez û Dr. Sadiq em her du jî şahid bûn û hetanî niha jî di vê derheqê de tu zanyariyek bilav nebûye. Ew bûyer renege bala dîrokzanan bo aliyê xwe rakêşe.

Heftiya "Wehdet" dest pê kiribû, û girevên giştî ber bi lédana derba herî daviyê li cendekê rejîmê diçûne pêş. Di vê serdemê de saziya netewî a zanîngehan biryar da ku karûbarên zanîngan ser ji nû ve, dest pê biket, û bo destpêkirina zanîngeha Terbiyet Moelim xelkê bang bikin da ku hinek kesayetiyan siyasî û rewşenbîrî û mesebî bo gotar xwandinê bêne bangkirin.

Ji aliyê praniya endamên şevra S.M.D Bangkirina ji Ayetullah Taliqanî û Bêhazîn û ... hate pesendkirin, ji bilî çend endamên din ên wek Dr. Taha Qasimî ku dijî vê yekê bûn ku kesê wek Taliqanî û Bêhazîn bihêne bangkirin. Li daviyê de biryar hate dan ku bo bangkirina Taleqanî bi awayê fermî sê kes ji endaman serdana mala navbirî bikin û li derheq beşdariya Bêhazîn jî tevî navbirî behs û gengeşe bê kirin.

Ew pêşniyara ji aliyê çend kesên wek Dr. Qasimî û çend kesên din ku kevirê îslametiye li singê xwe didan û dardestê Dr. Bihêştî û Hesen Ayet bûn hate gorê.

Şevkê berî mîtingê sê kes (Dr. Qasimî, Dr. Dadger û nûnerêkî din) diçûne mala rêzdar Taliqanî. Lê ji ber vê ku pêştir navbirî agehdar nekiribûn hetanê 8'ê êvarê li jor de çavniherê navbirî dimînin. Lê piştê ji ber vê rêza ku navbirî ji bo zanîngehiyan hebû, wan wêdigre.

Ew pîrsa ji aliyê nûneran ve tê bas kirin, rêzdar Qasimî dibêje gelo hûn dikarin tevî rêzdar Bêhazîn ku li eniya çep de ye beşdariyê bikin. Ew li bersivê de dibêje zor baş e, û ez jî hez dikim ku navbirî bibînim, çimkî li wê dema ku navbirî li girtîgehê de bû, ew derfeta ji bo min pêk nehat.

Wî piştê got li ber vê ku ez şevê li mal de narazê, sibê yek ji we bête şeqama Text Cemşid bo cem mala Rezayî da ku min bigehîne zanîngehê. Bi Dr. Dadger pêşniyar tê kirin ku wî erkî bigre stûyê xwe û rêzdar Qasimî jî dibe rêveberê mîtingê û kesê

sêyemîn jî dibe berpirsê anîna Bêhazîn.

Demjimêr 10'ê sibê, li bereberê birêveçûna mîtingê em çûne zanîngehê û me dît ku rewş pirr dijwar e. Me rû kire Dadger û me gotê gelo çima Taliqanî nehatiye, Dadger got dema ku em çûne ber deriyê mala Taliqanî, lê medît ku rêzdar Qasimî jî li wir e. Dema ku me jê pirsî ku tu çima hatî vir, wî got hewce ye em çend pîrsan ji bo Taliqanî zelal bikin. Piştê dema ku Taliqanî hat û got çima hûn her du jî hatine vir, Qasimî gotê Taliqanî, renege bi qazancê we nebe ku hûn bi Bêhazîn re di vê mîtingê de beşdar bin, çimku xwendekarên misilman jî vê pîrsê gellek aciz dibin. Piştê Taliqanî gotê, min her bawerî bi wan destebendiyan jî nine û heta hevlekî ji Parisê jî ji min re telefon kir, lê min gotê ezê beşdariyê bikim, lê niha ku hûn her du jî mamostayê zanîngehê ne û hatine vir, kerema xwe basê destebendiyan nekin, çimkî destebendî ne dirust e. Taliqanî piştê dibêje ku îznê bidne min ku ez peyamekê ji bo mîtingê bişnim, û piştê rû dikete Xanima Eizem Taliqanî û dibêje ku peyamê binivîse û bixwe jî bixwîne, ku deqê wê bi vî awayî bû;

Bi navê xwedayê mezin û bê heval

Gelî hevalan! Biborin, seba vê dema ku min pêştir bo televizyona Amerîkayê danibû, min nekarî li rê û resma îro de beşdariyê bikim, lê nivîskarê xebatkar, Bêhazîn, û ... beşdarin.

Ez hêvîdar im ku xwendekarên hêja û xelkê xebatkar ê Misilman bi giştî alîkar bin da ku li rewşeke aram de basên baş û pirr naverok birêve biçin, inşallah.

Dr. Qasimî daxwazê li Xatû Taliqanî diket ku peyamê bidê wî daku ew bixwe vê peyamê bixwîne, lê ew qebûl nake.

Her ku min pê danî nav zanîngehê min dît ku pîlan darêtine û gotibûne xwendekaran ku Taliqanî seba beşdariya Bêhazîn nehatiye. Li vê demê de bû ku berpirsê civînê bi navê Dr. Wisûlî daxwaz kir ku navê axavtinvanan bihê xwandin, lê Qasimî wek rêveberê mîtingê amade nebû ku navê Bêhazîn ragehîne.

Hevkarekî din ê me çû piştî tirîbonê û kurtiyek ji jiyannameya Bêhazîn xwend, ku ji nişkêve çend kesan dirûşm bi dijî Bêhazîn dan. Hevkarê me jî got Bêhazîn dawî girtiyê siyasî ê serdemê rejîma Şah bûye, û dirûşma "silav li Bêhazîn" got ku xelkê jî ew dirûşm dubare kirin.

Dema ku Bêhazîn hate piştî tirîbonê, nêzî 40-50 kes ji xwendekaran (yekemîn grûpa cilik şexsiyan) êriş kirne ser wî û ew piyalaya tijî avê awêtne ser dev û çavên wî û bi vî awayî ew mîting têk çû, û Xatû Eizem Taliqanî jî her derfeta axavtinê peyda nekir.

Her di vê rojê de em bi giştî tê gihîştin ku ew grûpa paremayî nahêlin ku şoreş rîya xwe a rastîn bipîve. Piştê her ew belaya hate serê me ku em dizanin û eva jî yek ji wan kiryarên destpêkî bû bo qorixkirina şoreşê.

Tevî rêz û silavên min ên bê davî ji bo giştî şehîdên rîya azadiyê, bi taybetî dostê min ê şehîd, Dr. Sadiq Şerefkendî, û ez hêvîdarim ku rojekê deshilatekî demokratîk û federal bihê avakirin.

Agibet cîhan hişyar bû: Tehrîma berpîrsiyarên rejîmê ji ber bînpêkirina mafên mirovan

Piştî wê ku DYA'ê li kiryarek bê mînak de 8 kes ji berpîrsiyarên payebilind yê Komara Îslamî ji ber pêpêskirina mafên mirovan tehrîm û sefer û dan û standinên aborî û malî yê wan li Amerîkayê de qedexe kir, bûye cihê keyfxweşiya azadîxwazan û afgîrên mafên mirov li Îran û cîhanê. Hevdem kempîna navnetewî a mafê mirov li Îranê de ji hemû welatên cîhanê xwast ku rayedarên payebilind yê Komara Îslamî ku berpîrsiyarê bînpê kirina mafê mirov li Îranê de ne, tehrîm bikin. Herweha serbarê pêşwazî kirin ji vê biryara Amerîkayê, ji Kanada, YE, Îmaretên Yekgirtî yê Erebî, Malizî û Taylend'ê ku bûne bi cihê ewle ji bo parastina heyîn û samana berpîrsiyarê rejîmê, daxwaz kir bilez li vê derheqê de reaksiyona xwe nîşan bidin.

8 berpîrsên tehrîm bûyî ev in: Mohamed Elî Ceferî(Fermanderê Giştî yê Sipaha Pasdaran), Sadiq Mehsûlî(Wezîrê niha yê Berevaniyê û Wezîrê hundir yê berê), Xolamhusên Muhsînî ijêyî(Dozgerê Giştî yê welat û Wezîrê berê Yê Îtîlaatê), Seîd Murtezewî(Dadsitanê berê yê giştî û Inqilaba Teheranê), Heyder Mislihî(Wezîrê Îtîlaatê), Mustefa Muhemed Nekar(Wezîrê Hundir û Cîgirê fermanderê giştî yê hêzên Întizamî), Ehmed Riza Radan(Cîgirê Fermanderê Giştî yê hêzên Intizamî) Husên Taib(Cîgirê Îtîlaata Spaha Pasdaran û fermanderê berê yê hêzên besic).

Li daxuyaniyê de hatiye ku Amerîka bi micidî li ser pêşvebirina mafê mirov li seranserê cîhanê bi taybet li Îranê de mikûr û pêdagir e. Her wekî wê ku Obama li axaftina xwe ya li civîna giştî a NY de anî ziman ku mafê mirov gotar û çemkek exlaqî û piraktîk ji bo Amerîkayê ye. Amerîka li rex xelkê Îranê ku dixwazin dengê wan bihê guhdarî kirin, dê bisekine.

Eva jî destpêka pirosekê ye ku diviya gelek zûtir bihatiba kirin û herweha diviya ew tehrîm hemû aliyên berpîrsiyar bi taybet Xamineyî û Ehmedîniyad li xwe bigre.

Bi giştî eva eyankerê vê rastiye ye ku heta rojava çavên xwe li hember cinayetên Komara Îslamî de bigre, nikare îdiaya berevanî ji demokrasîyê bike û heta piştî xwe bide azaadîxwazên Îranî ku li nav xwîna xwe de hatine gewizandin, nikare bêje ez alahilgîrê demokrasîyê li cîhanê di riya evîndarên azadiyê de me û dema ku xelkê Îranê dibîne ku rojava çavan li rêber û berpîrsiyarên cinayetkar yê wan piştevaniyê dike, her wekî wê ku heya niha kirine, dê çawan li ser wan bifikirin. Lewma ev gava Amerîka heya qasekê mural û rohiye da ber dilê azadîxwaz û têhniyên azadiyê li Îran û cîhanê de.

Rojev

Teknîka dubare a rêberiya Îranê

W: Arîn

Rîçard Hirtsîngir, şirovekarê Rojnameya Almanî a "Dei Wolt" çend rojan berî niha li şiroveyek

xwe di wê rojnameyê de diniwîse ku rêberiya Komara Îslamî bi caran ji şêwe û teknîka dubare bi rojava re mifah standiye û liviyaye.

Ew, teknîka rêberiya Komara Îslamî bi vî awayî dide eyanê: Komara Îslamî li destpêkê de rojavaya ku jê bi kerb û kîn in, bi gotinên xwe yê êrîşberane tûşî şok û heyrîmanê dikin û paşan li dema ku rojava li halê reaksiyonên dîplomatîk yê kêrahtî ji bo handan û mendeşoşiya xwe ye, bilez radigehîne ku amadeyî got û bêjan di nîqaşên etomî de ye; nîqaşek ku dawiya wê tune ye.


Bi raya vî şirovekarî, rastiyan nîşan daye ku rêberiya Teheranê her car di vê teknîka xwe de biserketiye. Ew dinivîsîne ku dewlet û dîplomatên rojavayî jî hercar teslîmî sozên pêşniyazkirî yê Teheranê dibin û bi nîrxandina rayên ku li Îranê de li çarçoveya vê pêşniyazê de ne, hewil didin bizanibin ku ew pêşniyaz heya çiqasekê micid e.

Hirtsîngir li ser vê bawerê ye ku vê carê jî wusan bû: "Gotinên bê bîngeh û dînane yê Ehmedîniyad li civîna salane ya NY'î de ku wî xwe têde bi teoriya pîlanê mijûl û germ kir û got: enî û aliyek ji dewleta Amerîkayê bi xwe berpîrsiyarê bûyera 11'ê Septamberê ye, lewre tenê hewce bû ku dîplomatên rojavayî li helwest û reaksiyona derheq gotinên wî de hola civînê biterkînin. Mirov ji xwe dipirse, başe çima ew qehreman(dîplomatên Rojava) her li destpêkê de çerenivîs û rewşa xwe bi wî serokkomarê bikerb û kîn û devbixwîn yê Îranê rohn nakin?

Ew dinivîsîne girîng nine ku Ehmedîniyad gaziya jiholêrakirina Îsraîlê dike yan Holokastê înkâr dike, yan Îranê bi hêzek hevterîb li gel Amerîkayê dihesibîne. Ew dipirse ma gelo gotinên wî bi qasê hewce bêser û ber û şêtane ninin ku bikare ev kême hêviya rojava li vedîtina eqliyanetê li Ehmedîniyad de bike bolqa ser ave?

Nivîskar îsare bi gotinên Wezîrê Karê Derve yê Alman dike ku piştî nîşandana amadejiya Ehmedîniyad ji bo destpêka got û bêjan, bilez helwesta xwe nîşan da û ew bi nîşaneyek erênî da zanîn. Li gor wî heya dema ku Îran dawî bi mehândina Uranîyomê nehine û îmkana lêgerîn û vekolîna bi tewahî a navendên navîkî pêk neîne, her eva ku bi salan e Şêwra Ewlekar xwazyarê wê ye, îmkaneke ji bo got û bêjên bi wî welatî re nine.

Hirtsîngir bawer e ku zêdeyî wan xwastekan livîn û riftarkirin, tiştê xincî dem kuştinê nabe û Teheran jî hertim wê teknîkê weke alavêkê ji bo kîrîna demê bikar tîne heta ku teknolojiya xwe ji bo



çêkirina bombeya etomî tewaw bike.

Rejîmek ku neyarên navxweyî bi "dujminên Xweda" dihesibîne

Şirovekarê "Die Wolt" dibêje ku rejîma Komara Îslamî a Îranê tenê bi vê sedemê mezintirîn gef û serşoriya şaristaniyeta mirovahiyê nine, û renga jî bi zûyî bigihîje çeka navîkî, yan bi şandina terorê, devera Rohhilata Navîn ne ewle dike û yek ji astengên sereke li ser riya aştiya Rohhilata Navîn e.

Bi raya Hirtsîngir, bi sistemekê re ku rexnegir û neyarên navxweyî yê xwe bi "dujminên Xweda" dide zanîn, wan bi awayek sîstematîk îşkence dike û bi sedan kesan îdam dike, jinan jî ji ber têkiliyên nerewa bi mirinê ji riya kewirbaranê mehkûm dike, hevregêbaz "hemcîngera"an jî bi Ceresqîlan ve didalîqîne, ne tenê mirov nikare got û bêjên dîplomatîk bi "asya" bibîne, belkî heta nabe bi vê nîzame re dan û standinên aborî û bazerganî yê asayî jî bike.

Totalîtarîzma dînî ya Îranê vegeriya bi hovetiya destpêkîn

Nivîskar têkiliyên bazerganî yê Îran û Alman dide ber rexneyan û niwîsandîye: "Bi taybet Alman divêt ji xwe bipirse ku çima li nîviya yekem ya îsal de, serbarê tehrîman, qeware û baristayîya hinardeyên xwe bi Îranê bi qasê %14'an zêde kiriye û çima bankê Ticaret a Îran û Ewropayê li Hamborgê de nehat daxistin.

Bi raya wî şirovekarê Almanî, bi dehan sal e ku karnasên riya verewandina girjî û aloziyan li xewna "îbralizê kirin" a rejîma komara Îslamî de bi ser birin, lê berevajî wê rû da. Totalîtarîzma dînî ya Îranê ger em bêjin hinekê xawtir bibû, lê niha vegeriya bi tundajotiya destpêkîn. Lewma ev rejîme divêt li hemû biyay û astên navnetewî de were îzole kirin. Dorpêç û tehrîmên heya niha têr nekirine, divêt bi awayek meremdar hemû rê û kanalên pare ber bi Îranê bihên daxistin û qut bikin.

Bi raya Hirtsîngir, hemû pêwendî û têkiliyên fermî bi nûnerên Îranê divêt bihên qutkirin, meger eva ku berî her pêwendiyekê, berpîrsiyarên wî welatî bi bînpêkirin û pêpêskirina tund a mafê mirov û bînpêkirina pêgeha mirovî li Îranê de bihên berbirûkirin. Ew dibêje ku ne tenê ji ber bernamêya navîkî ya wî welatî, belkî Komara Îslamî divêt encamên pêpêskariyên mafê mirov yê xwe his bike.

Nivîskar hişdariyê dide ku li egera ku pêşiya vê hêza metirsîdar nehê girtin yan nehê kuntîrol kirin, wê demê divêt çavnihêriya qewmîna karesat û tirajîdiyêk mezin li Rohhilata Navîn û heta li hemû cîhanê de bin.

Die Wolt

Binîzamîkirina organên civakî



Ceifer Mubeşirîya

Çend roj berî niha di du nûçeyên cuda de hat zanîn ku li Îranê 60 hezar dibistan ji bo xwandina dersa Quranê ji bo zarokên

sefa sê ya xwandina destpêkî hatine avakirin. Hêjayî gotinê ye ku ev karê han bi gotina berpîrsên xwandinê di Îranê de, li himberî "piropagendeya zêdexwazan bi dijî Quran û Îslamê" hatiye encamdan.

Ji aliyek din ve jî piştî kuştina du pizîşkan li bajarê Tehranê û birîndarkirina du nojdarên di nexweşxaneyekê de bi awayek nerohn, biryar hatiye dan ku hêzên întizamî û polîs bi berdewamî di nexweşxaneyan de bin, herweha alavên xweparastinê jî li bal pizîşkan hebin.

Di welatekê de ku hikûmet li ser bingeha olî hatibe ava kirin û di esla birêveberiyê de yasaya olî di rojevê de be, siroştîye ku bi awayek berbiçav girîngî bi xwendina olî tê dayîn.

Lê ewa ku di vî karî de cihê gumanê ye, du pîrs in ku di vir de derdikevin holê û bi awayekê peywendî bi hev re hene. Ya yekimîn çima ji zarokên qonaxa destpêkî re dibistanên xwandina Quranê hatine avakirin. Dûyem jî gotina Birêveberê Şêvra Bilind a "Hînkirin û Perwerde" ye ku gotibû: " Bo jinavbirina rewşa nebaş a piropagendeya zêdexwazan pêwîst e xwandina hizr û ramana Quranî ji caran xurttir bikin", di heman dem de zêde kiribû ku Dibistanî û Mamosta di dibistanan de baştirîn zemîne ji bo belavkirina piropagendeya peymana "Înqilab" û Îslamê di asta cîhanê de ne.

Di vir de pêwîste ev yek bihê gotin ku desthilatdarên ku xwe mîratgirên ola Îslamê dizanin, xwe di refa yekimîn a birêveberên wê olê de dibînin, xwe bi nûnerê Xweda li ser erdê didin zanîn û bi bawera wan şîweya birêveberiya wan ji birêveberiya serdarên Îslamê cuda nine, herweha di wê bawerê de ne ku yasaya bingehîn a wan ji yasaya Quranî cuda nine, ji aliyê din ve jî gotina birêveberê Şêvra Bilind a Hînkirin û Perwerde ye, cihê gumanê ye ku di wan dibistanan de çî waneyek dê bihên gotin û bi mifah sitandin ji mesebîbûna civaka Îranê, dê zarokên xelkê çawan biperwerînin.

Dema ku rejîma Komara Îslamî di tepeserkariyên hovane ên ji aliyê organên nîzamî ve û bi siyasîyên xwe ên qirêj di nawendên hikûmetî de bêakam ma, dest avêt çeqandina rehên xwe ên çepel di navendên civakî de. Bi taybetî dema ku derbek giran di çend salên dawî û bi taybetî di sala derbazbûyî de di Zanîngehan de xwar, û bi girtin, îşkence, destdirêjiyên cinsî û kuştin û îdama xwendekaran nekarî berî ji



pêla zanîn û mafxwazî û xweseriya qutabî û xwendekaran bigre, vêca demara eslî ya wan peyda kir û bi navê xwandina Qurana pîroz 60 hezar Dibistan weke destpêka piroseyek demdirêj di welat de ava kirin û biryar e ku di 15 meha Xezelwer rojî a îsal de dest bi karê xwe bikin.

Dema ku bi zimanê xwe radigihînin ku dibistan baştirîn cih e bo piropagendeya şoreşa Îslamî a Îranê, êdî gumanek namîne ku ew dibistanên ku bi navê xwandina Qurana pîroz hatine ava kirin, weke her car destpêka karek mirar û malwêranker a bi awayek nerm ku weke gurê di kewilê pez de, bi navê ola Îslamê belayek kartêkirtir ji caran û xapandinek din tineserê xelkê. Di rastî de mirov dikare bêje ew dibistanên han dê bibin bingehên piropagendeya siyasîyên qirêj û fesada Komara xwînmij û xapîner a Îranê.

Ev şîroyên han bi vê sedemê tên kirin ku di xwandingehên Îranê de hertim xwandina Qurana pîroz hebûye, Quranxwînen Îranî hertim di welatên Îslamî de di rêza yekimîn de bûne, lê ma cihê xwandina Qurana pîroz di Hucre û Mizgevtan de ye yan dibistanên destpêkî. Lê ji komara Îslamî re çî cihek ku xelîk bi evînek taybet ve rû jê bike, ew wir bi armanc digre bo tevîkirin û ji rêderxistin di pêvajoya dirust a kar de.

Ji aliyek din ve jî di pilanek darêti û di kumpiloyek bixof de, organek din a civakî di Îranê de nîzamî kir.

Heyamek berî niha li bajarê Tehranê du Pizîşk hatin kuştin û piştî di nexweşxaneyekê de du perestar hatin birîndarkirin. Piştî wan bûyeran, gotinên zaf ji aliyê Wezîrê Saxlemiyê ve hatin kirin, lê di rastî de ew gotin tenê hêcetek bûn ku bikare pasawek bi cih ji bo bi nîzamîkirina

nexweşxaneyan bike.

Ew karê rejîmê êdî jidestdana bi yekcarî a her normeke exlaqî û mirovahiyê ye. Gelek caran hatiye bihîstin ku di demên şer de, nexweşxaneyên aliyekê dibin cihê xizmetên mirovanî ên birîndarên aliyê din "dujmin". Lê kar û kiryara Komara Îslamî û pilanên li pêvajoya qazanc û berjewendiyên xwe de, hemû sînorên mirovahiyê bezandine û ji dujminahiya bi xelkê Îranê re jî derbas bûye.

Bi bawera min tenê cihê ku bi tewahî hêzên nîzamî ên rejîmê têde desthilatdar nebûn û şîweya kar bi awayek "profîsional" û dûr ji xweyî û nexweyîti dihat birêvebirin, nexweşxane bûn ku renge hatin û çûyîna xelkê û çareseriya nexweşan ji kuntirola tund a hêzên ewlehî bi dûr be, yan naskirina nexweşan bi taybetî naskirina kes û kar û hevalên wan nexweş û birîndarên ku pîrrianiya caran bi destê hêzên mirovkuj ên rejîmê dikevin nexweşxaneyan, herweha hevkarîyên mirovhezane ku carna ji aliyê hin pizîşkan ve ji bo hin kesan tê kirin ku renge fikrên wî kesî li gel siyasîyên Komara Îslamî hevahengî nebe, bi giştî xistine bin kuntirolek tund a nexweşxaneyan û di wir de jî dinavbera nexweşan de jî tovê xweyî û nexweyî û fitne û dubendî bihê çandin, ew jî bi biryarek hat nîzamîkirin, bi cihgîrkirina hêzên întizamî û hêzên polîs herweha çekdarkirina pizîşk û kadroyên nexweşxaneyan û kuntirola tund li ser kes û karên nexweşan bi carek ewlehiya nexweşxaneyan tevîheve dibe ku eşkere ye jî bi wê rewşê ya bi navê parastina pizîşk û kadroyan ji gefên kuştinê ji aliyê mirovên nenaskirî ve di nexweşxaneyan de êdî tu car ew nexweşxaneyan aramî û ewlehiyê bi xwe ve nabînin.

Gelaleya Perlemana rejîmê û rewşa jiyana mamostayan li Îranê

Şerîf Felah

Rewşa dawîn a damezirîna mamostayên "hequltedrîs" di Perlemana rejîmê de ket ber bas û gelaleya çend meh berî niha a Perlemanê di bas li ser hat kirin, lê heya niha rêjeya zaf a mamostayên ku hejmara wan 60 hezar kes diben, çarenivîsa damezirîna yekcarî a wan nediyar e.

Pêtir ji 600 mamostayên dibistanan ên Îranê ku ji aliyê perwerdeyê ve bi neçarî hatine xanenişkirin, bi mebesta derbirîna nerazîtîyê li himber Perlemana rejîmê dest bi civîna nerazîbûnê kirin û xwazyarê guhertin di pêkhate û birêvebiriya sistema perwerde di Îranê de bûn û daxwaz kirine ku hêza însanî a dilsoj, çewşekarane li ser kar nihên derxistin. Lê tu ji berpîrsên Perlemanê bersivderê xwastên mamostayan nebûn û ew pîrsa girîng jî her wa çaresernekirî maye.

Qata mamostayan li Îranê her di destpêka hatine serkara Ehmedînijad, seba nerazîbûn li siyaseta tevlihev û aloza sistema perwerde û komek ji daxwazên sinfî û meîşetî ên rewşa bi awayek xurt di seranserî Îranê de bi taybetî di navendên sinfî ên mamostayan li himber siyasatên şaş ên rejîmê rawestane û ew bizava nerazîtîyê xurtir û geştir û çend xwenîşadan û meşên berfireh bi taybetî di bajarên Kurdistanê de derketin holê ku bi awayek hovane hatin tepeserkirin û pîrriyaniya berpîrs û çalakên sazîyên sinfî hatin destbiserkirin û dadgehî kirin.

Ew pîrsgirêk niha jî berdewam e û hemû salekê digel destpêka demsala Payîzê û vebûna dibistanan, dîsan di serî de nû dibe û dikeve ber bas.


Mamosta weke qatek dilsoj û hînkêr di

civakê de ku nîfşên îro û pêşerojê bi hewl û tekoşîna wan perwerde dibin, li Îranê de li bal rejîmê xwediyê tu pêgeh û giraniyekê ninin, xêncî sepandina komek ji yasayên bê bingeş bi ser wan de, heta di warê meîşetî û bijîva jiyana de jî di rewşeke pîr xerab de dijîn û bi neçarî jî bo çareserîya wan pîrsan dest bo zaf karan dibin.

Hêjayî gotinê ye ji wê dema ku nûnerên Perlemana rejîmê deng bi wê gelaleyê dan ku gerek di heyamê pênc salan de 60 hezar mamostayên nefermî "hequltedrîs", bihên damezirandin, salek derbaz bûye. Bi vî halî jî heya niha hejmarek kêmtir hatine damezrandin û ên din jî her wa sergerdan in û di dema wajoja damezirandina girêbendê de, soz ji wan tê standin ku ger di heyamê pênc salan de nekarin bawer û hitbara berpîrsên perwerdeyê bidest bixin, berpîrsan mafê wê yekê hene ku girêbestên wan nû nekin û mamostayan jî mafê derbirîna tu nerazîtîyê ninin, ku wê yekê jî bi tewayî mamosta perîşe kirine.

Ku waye rewşa aloz, nebûna mûçe, zext û givaşên jiyana û meîşetê, zext û givaşeke zaf bo mamostayên nefermî "hequltedrîs" aniyê û ligor serhejmariyan pêtir ji yek milyon ji mamosta û qata çandî di Îranê de di bin tundtirîn zext û givaşên abûrî û sinfî de ne û mêjdem e ku xwazyarê zêdekirina mûçeyê xwe ne û daxwaz dikin ku weke qatên din ên karmendên dewletê bihên hesabandin û di vî riyê de jî bi salane ku ew qata fidakar û cangozî zaf nîrxêin manewî dane, lê heya diçe rewşa wan ber bi xerabtirbûnê ve diçe.

Yasaya birêvebiriya xedemata welat di sala 1386 a Rojî de hat pejirandin, serbarê hebûna zaf yasayên ku berevajî xwastikên



mamostayan in, lê bichanîna wê yasayê jî paşketiyê. Îsal hikûmeta Ehmedînijad xêr kir û biryar da ku tenê 6 jî sedî a mûçeya mamostayan zêde bike, ewa jî di halekê de ye ku di benedê wê yasayê de hatiye ku mûçeya mamostayan dibe ligor wê nîrxê helawsana abûrî a ku Banka Navendî radigehîne, bihê zêdekirin, lê ew soz jî şikand û bi cih negihand.

Lewra dikarin bêjîn rewşa karî a jiyana mamostayên zehmetkêş ên welat, rewşa gişt qatên din ên civaka aloz a Îranê ye, lewma nerazîtîya wan dengê nerazîtîya hemû xelkê Îranê ye ku di qirika perwerdekarên dilsoz ên nîfşa niha û pêşerojê de bilind dibe.

Hakan Karsak: Kesa sereke ku "Mîn Dît" finanse kiriye, dayîka Miraz e. wê mal û erebeyêke xwe firot ji bo despêkirina kişandina filmê

Hevpeyvîn: Zinar Ala

Di meha nîsana bihorî de ez çûbûm bajarê San Sebastianê ta ku ez beşdarî panelekê bim

derbarê filma "Min Dît" ya Miraz Bêzar. Panel di nav çalakîyên festîvala Sînema û Mafê Mirovan ya bajarê San Sebastianê hatibû lidarxistin. Lîstîkvanê sereke di filma "Min Dît" de Hakan Karsak di vî panelê de jî cih girtibû. Di festîvalê de bi dehan kurtefilm û filmên dirêj hatin pêşandan, di nav van filman de du film hebûn ku behsa Kurdan dikirin, filmê Fransî "Welcome" û filmê "Min dît / Zarokên Diyarbekir" herdu film jî di heman rojê de jî hatibûn nîşandan.

Berî nîşandana filma "Min Dît" di teatra "Victoria Eugenia" de Hakan

Karsak bi çepikên germ ji aliyê cemawerê festîvalê hate pêşwazîkirin. Lîstîkvanê sereke di "Min Dît" de nivîskara filmê Evrîm Alataş bi bîr anî û got: "Evrîm niha ne di nav me de ye, em pîr ji wê hez dikin û em bîriya wê dikin". Hakan di dawîya axaftina xwe de li banî nihêrî û got: "Em dizanin ku niha ew li jor me dibîne, em serkeftina xebata xwe diyarî Evrîmê û hemû zarokên Kurd dikin".

Paşan me derfet bi hewce zanî û ew hevpeyvîna li bajarê San Sebastianê ligel lîstîkvan Hakan Karsak re pêkanî.

Cara yekmîn "Mîn Dît" li cîhanê li welatê Bask di festîvala "San Sebastianê" de hatibû nîşandan, û cara pêşî li Tirkiyê di festîvala sînamyê li Antalyayê hatibû nîşankirin, hûn dikarin ji me re



behsa hestên xwe û reaksiyon cemawerên festîvalan li ser filmê bikin?

Di festîvala "San Sebastianê" yekemîn car ez xwe di sînamyê de dibînim, min xwe li ser perdeya spî didît lê min tiştekî fam nedikir, ango min nizanibû rastî bû yan jî xewn bû, di dawîya filmê de ji xewna xwe şiyar

bûm û min got: "Belê, ev xebatekî mezin e ji bo Kurdistanê". Li aliyê din jî min hêstir di çavên gelek kesan de dîtibû, gelek ciwan hatin silav dan me û hinekan jî Miraz Bêzar hemêz kirin. Gelekan li pey hev di dorê de sekinî bûn ta ku dengên nirxdayîne bidin filmê.

Li festîvala Antalyayê dîsa di hundirê salayê de reaksiyona cemawer gelek xweş bû, nêzîkî 800 kes hebûn, piştî dawîbûna filmê hemû rabûn ser piyan û dengê çepikan bilind bû, lê vê carê ez bi tirs dihasiyam û min digot piştî dawîbûna nîşandana filmê polis wê li ber deriyê salayê li benda min bin. Di civîna çapemenî de kesên nijadperest hebûn û ji me re digotin "Hûn çawa dibêjin ka welatê min Kurdistan?"

Li ser dika teatroya "Victoriya Eugenia" hûn bi ferehî li ser Evrîm Alataş axivîn û we serkeftina filmê diyarî wê kiribû. Çima?

Wek hûn dizanin Evrîm di 12 Nîsanê de jiyana xwe jidest dabû, ev wendabûnek mezin bû ji bo Kurdistanê re. Evrîm mirov û nivîskarek pir baş bû, Evrîm weke Mihmed Uzun wê herdem di dilê Kurdan de bimîne, em wê ji bîr nakin, emê her çax wê bi bîr bin.

Gelo hûn çawa hatin hilbijartin ji bo vê rolê?

Miraz hatibû Diyarbekirê û xebata min di lîstika Kurdî "Mala Dînan" û ya Tirkî "Özgürlüğün Bedeli" de dîtibû û di cih de gotibû: "This is my actor".

Miraz ji min re gotibû: Divê tu vê rolê bilîzî ji bo Kurd û Kurdistanê.

Miraz Bêzar di hevpeyvîneke xwe de ligel rojnameya GARA behsa zêrî û mercên dijwar derbarî fînansekirina filmê kiribû, Miraz gotibû ku lîstikvan ti pere nestandin, hûn dikarin behsa van mercên fînansekirina filmê bikin?

Rast e, hemû lîstikvan ti pere li ser xebata xwe wernegirtine, ez bi xwe peran jî naxwazim, min ev xebat ji bo naskirina rastiya rewşa Kurdan kiriyê.

Kesa sereke ku "Mîn Dît" fînanse kiriyê, dayîka Miraz e. Wê mal û erebeyê xwe firot ji bo despêkirina kişandina filmê. Her wiha merivê Miraz, Fikry Kultay gelek peran dabû ji bo lêçûnên filmê, di dawî de jî derhêner Fatih Akin destek dabû Miraz ji bo derxistina filmê.

Kelema kêmbûna peran hîşt ku çêkirina filmê sê salan li berxwe bide.

Hêjayî gotinê ye jî, ku Miraz lêçûnên dibistanê dabû zarokên filmê û her



wiha ji bo lêçûnên din, wek mînak lêçûnên hatina Şenay ji bo festîvala Ghent li Belçîka.

Te rola "Endamekî JITEMê" standibû, gelo rola te li Kurdistan û Tirkîyê çawa hate pêşwazîkirin?

Berî ez bersiva pirsê we bidim, tenê dixwazim behsa bandora nîşandana Mîn Dît li festîvala Antalyayê bikim, ji ber ku em hemû kes li Tirkîyê dizanin ku "JITEM" li Kurdistanê bi karê kuştinê radibûn, û kiryarên kuştinê di bin navê kiryarên nenas de dihatin qeydkirin. Lê piştî festîvala Antalyayê Hem hikûmet hem jî artêş gotin ku ew JITEM ê nas nakin, JITEM rêxistinek e îlegal e.

Rola min ji aliyê Kurdan ve gelek hate ecibandîn, lê di aliyê din jî kesên ku ji vê kesyatiyê hez nekirin pir bûn. Li kolanên hinekan li min dinihêrîn û bi tiliyên xwe nîşanî min dikirin û digotin "Emê serê te jêkin", gelek email, telefonên tehdîtîkirinê ji min re dihatin, têde dijûn li min û malbata min dikirin, bi xiyaretê ez tawanbar dikirim û her wiha nameyên tehdîtîkirinê di bin deriyê malê de jî dihiştin".

Gelek hevalên min yê zanîngehê û teatroyê ji min re gotin: **"Êdî tu ne hevalê me ye"**

Hûn bi Kurdî nizanin, gelo hûn çawa beşdarî lîstikên bi zimanê Kurdî dibin?

Hevalê min yê şanoger alî min dikin, ez teksta lîstikê ezber dikim û rola kesaytîya xwe difîzim. Lê ez zêde xebata şanoyê bi zimanê Tirkî dikim, niha em difikirin ku em çîrokên Kurdî bi Tirkî pêşkêş bikin wek Mem û Zîn, Cembelî û Binfeş û hwd.

Wênayên we yê cilên leşkerî yê dema leşkeriyê ne, ango we ji bo çêkirina filmê kişandibûn?

Wêne berî çêkirina filmê me kişandibûn, dema leşkeriyê ne bîranînek xweş e ku mirov wênayan wê demê li cem xwe bihêle. Ji cilên leşkeriyê û ji rahiştina çekan hez nakim.

Lê wênayên şahiya zewacê yê di filmê de derdikevin ew orîjinal in. Sevgî yê ku di filmê de jina min e her wiha di jiyandê de jî hevsera min e.

Niha li Tirkîyê hin gav têne avêtin ji bo çareserkirina pîrsgirêka Kurdî, gelo hêviyên we ji van gavan çî ne?

Berî her tiştî hêvî dikim ku zarokên me yê di zindanan de serbest bêne berdan her wiha ez azadî ji paralamanterên Kurd re dixwazim.

Ku zarokên me zimanê kurdî di dibistanan de bixwînin.

Em dixwazin di bajarên xwe de bê tirs bijîn, nawaxim ku tank û erebeyên leşkeran di bajarê xwe de bibînin, bi hezaran leşker di kolanên bajarên Kurdî de digerin, li Izmir û Bursayê rewş ne wisayê.

Kurtejiya Hakan Karsak:

Hakan Karsak li Amedê sala 1975 an ji dayîk bûye.

Zewicî ye û zarokeke wî bi navê Jînda-Deniz heye.

Xwendina şanoyê li Ankara Sanat Teatro li û Ankara Çaqadaş Sanat Teatro standiye. Û li van cihan jî xebata şanogeryê kiriyê: Ankara Yeni Meydan Sahnasi, Izmit Yeni Meydan Sahnasi, Unicef, Navenda Çanda Mezopotamiya li Diyarbekirê û li şanoya şaredariya bajarê mezin ya Amedê.

Di 48 saliya serjmartina awarte de Kurdên Sûriyê Ji Warên Xwe Koç Dikin

Cemşîd Bagokî

Kurdên Sûriyê (Cizîr, Efrîn û Kobanî), anko Kurdên Binxetê ji warê xwe koç dikin. Belê ji

warên xwe koç dibin. Ji ber xizanî, feqîrî û hejariyê direvin û derbider dibin. Nexasin di van çend salên dawî de, piştî rûdanên 12 ê adara 2004 an û bi taybetî piştî ku dewletê fermana 49 an, di roja 10/09/ 2008 an de derxist. Ji wê hingê ve feqîrî û hejariyê konê xwe bi firehî di ser xelkên Cizîrê re vegirtiye û bi taybetî di ser Kurdan re.. Ta radeyekê ku pêkanîna gepa nanê rojane bûye problemeke mezin ji piraniya xelkê re..

Vêca xelkên Cizîrê ji neçarî, bajar û gundên xwe bê plan li şûn xwe dihêlin û koçber dibin.. Berê xwe didin bajar û metropolên wek Şam, Heleb, Beyrût, Emman.. li wan bi cih dibin.. jixwe yê ku zîrek û jêhatî be, ji xwe re dibêje; ya ji texte û ya ji bexte, milk û malê xwe difroşe, xwe li mirinê diqelibîne da ku xwe bi Ewrûpa ve bigihîne.. Di encam de, ji koka xwe bi dûr dikevin.. Ji jiyana xwe a xweristî vediqetin.. Ji ziman û kultura xwe a netewî qut dibin.. Sax ji warên xwe derdikevin, mirî li şûnewaran vedigerin.. Di navbera Xelîl û Celîl de jiyana xwe derbas dikin..

Ji rexekî din ve, gundên wan yên ava li rastê dimînin.. Dibin xirbe.. Bîrên ava wan dixitim.. Bilbil ji şûnewarên wan bar dikin, kund li wan dixwînin.. Çûkên Beytik ji wan dixeyidin.. Kewên Gozel ji şûnewarên wan bar dikin.. Û êdî nema şivan û gavan li dor gundên wan têne dîtin.. Nema kes dengê reyandin û kewtikewta segan dibihîse.. Mişk, tûpişk û mar di nav kavîlên gundên wan de henekan dikin..!

Jixwe xezeba Xwedê a herî mezin eve, ku ji berî çend salan ve baran nebarndiye.. Çemê Xabûr miçiqiye û çemê Ceqceq çikiya ye.. û di encam de zevî hişk mane.. Her wiha hin bi hin çolistan berê xwe fireh dike..

• Tu dibêjî qey dinya li serê Kurdên sûriyê xera bûye..! Qey fermana wan rabûye.. Erê ferman..!

Û wiha kesayetiya mirovên kurd yên ku li Cizîrê, Efrînê û Kobanî mayîn û yên jê derketî tê derizandin, şikestin û guhertin.. Di vê rewşê de zane bûne nezan, nezan bûne zane.. Hest û raman tevî hev bûye.. Bawerî birîndar e û nalenala wê ye.. Belê, Kurdên Binxetê ji warê xwe koç dikin.. Xwendevano! De were çareyekê ji vê kêşeyê re bibîne?!

Gelo em berê xwe bidin kû û kê?!

Hema heta vir bes e û ez bi xêr û hûn bi selameti.

Ferhenga Ansîklopedîk a Kurdî

Ew berhem bi du zimanan hatiye amade kirin. Bîngê bi zimanê Kurdî û daxuyanî kirin jî bi zimanê Tirkî ye.

Destpêka nivîsandina berhemê di sala 1977 an de heya roja îro, di navbeynê 33 salan de hatiye amade kirin.

Mezînahiya berhemê: Ferhenga Kurdî-Tirkî Ya Ansîklopedîk 3 berg û 2282 pel in. Di naveroka wê de 2533 wêneyên rengîn û yên reş û spî hene.


Di wê berhemê de ku ji sê ciltan pêk hatî, 100. 000 (sed hezar) zêdetir bêje (wûşe, sernivîs, dîrok, wêje, erdnigarî, civak û komelnasî, rêzanî (politîk) û biyografîyên Kurd û Kurdistan û yên hemî çîhan di berhemê de hatine kom kirin. Dar û ber, kulîlkên ji hemî rengan, ajal û riwêk, hemî bi

rengên sirûştê, ewna bi rengên xwe yên taybet in.

Em dixwazim vê berhemê li welat jî bi alikariya weşanxaneyekê bigihînin gencîneya çanda Kurd! Lê çî mixabin weşanxaneyek Kurd ewqas dewlemend li welatê me nîn e, ku vê berhema ji 3 ciltan pêk hatî bi çapek ofset bide weşandin. Ji bo vê jî, em li hêviya pêşniyaz û xwestekên saziyên Kurd resen in. Pêşniyazên bînan, em bawer dikin ku yê duweroj de, çapkirin û belav kirina wê berhemê hêsantir bikin!..

Kaniya Helbestan

"Şeva Hîcran"



Helbest: Cegerxwîn

Di tarîka şeva hicran çiraxek sîfet im ya Reb

Ji ser heta piyan are , bicarek vêketim ya Reb

Nema min sebr û aramek ji ber jana evîna dil

Evîn behre belê tenha di ber pêlan ketim ya Reb

Ji dîlber dûrketim lewra bela ser daye can û dil

Temaşa nakî ey zalim kî ez bê taqet im ya Reb

Meger pirsê li min nakî belê tim tê xiyala min

Şev û rojan bi nalînim bi ah û hesret im ya Reb

Şev û rojan bi kovan im bi bilbil re dilovan im

Hevalê xuncê baxan im , ji gul ez dûrket im ya Reb

Digel bilbil dinalim ez , zirav im wek hilal im ez

Şikestî rengê dalim ez , di halê hirqetim ya Reb

Di kûra 'eşqê borî me , yeqîn ez pîrê torî me

Di "lailma " derûrî me , di qeyda hicret im ya Reb

Meger ez Rustemê kurdîm firaqê ez nexweş kerdim

Cegerxwînîm siyahçerd im , di kunca xelwet im ya Reb

Pênûsa zêrîn a Azadiyê ya sala 2010'an pêşkêşî Ehmed Zêdabadî hat kirin

Nawenda cîhanî a belavokan, roja Çarşemî, 6'ê Çiriya Pêşîn, di rê û resmek fermî de, Pênûsa zêrîn a azadiyê a sala 2010'an pêşkêşî Ehmed Zêdabadî kir.

Ew nawend di sala 1948 a Zayînî hatiye damezirandin û binkeya wê li bajarê Parîsê ye. Rojnamevanên 122 welatan, endamên wê nawendê ne ku hejmara wan pêtir ji 1800 kes



in. Armanca wê nawendê parêzvanî û jorde birina azadiya belavokan û hevkarî bi xweseriya wan a malî, berfirehbûna ragihandinên nivîskî û dîjîtalî, hevkarîya di navbera sazîyên endam di asta millî, navçeyî û navnetewî hatiye avakirin.

Ew navend her sal di asta cîhanê de, yek ji rojnamevanan jiber çalakiyên azadîxwazane, weke rojnamevanê herî çalak yê cîhanê hildibjêre û Pênûsa zêrîn a azadiyê di yek ji bajarên cîhaê de jêre pêşkêş dike.

Pêşmergeyekî PDKÎ Bawernameya Navnetewî A Rojnamevaniya Werzişî Wergirt

Pêşmergeyekî PDKÎ, bi navê Rehîm Ehmedîpûr, ji aliyê Civata Cîhanî a Rojnamevanên Werzişî a "A.I.P.S"ê ve bawernameya navnetewî a rojnamevaniya werzişî jêre hat bexşîn.

Wê civatê roja 10 -13'ê Îlona 2010'an, li bajarê Hewlêrê, ezmûn û çeribînek bo rojnamevanên werzişî di



çend beşên: Nûçegihanî, rojnamevanî, fotografirafî, dîzayn û karê Radyo û Televîzyonê de û bi beşdariya çend mamosta û pisporên navnetewî lidarxist.

Rehîm Ehmedîpûr piştî çar salan karê berdeham li rêya Navenda Lêkolîna Werzişî a "R.F.G" a Amerîkayê, serbarê bidestxistina pileya yekem di beşa rojnamevaniya werzişî de, Pênûsa zêrîn bo parastina mafên werzişî ên gelên Îranê bi dest anî.

Navhatî wek rojnamevanê Kurd ê Rojhilatê Kurdistanê bawernameya navnetewî a Civata Cîhanî a rojnamevanên werzişî wergirt.

Mêrê 130 jinan û bavê 210 zarokan bû

"Akuku Danger" 130 carî zewicî bû. Mêrê 130 jinan bû, jina wî ya herî dawîn, 18 salî bû.

Ew di 92 saliya xwe de mir.

Ew ji welatê Kenya bû, lê belê di zewacê de rekora dinyayê şikandibû.

Navbirî 30 carî jî jin berda bû.

Cara yekemîn ew di sala 1939' an de zewicî bû.

avestakurd

Romaryo bû Parlamenterê Brazîlê

Lîstikvanê futbolê yê Brazîlî Romaryo (44), di hilbijartinên Parlamentoya Brazîl de bû parlamenter.

"Romario" ji partiya Sosyalist ya Brazîlê namzedê bajarê Rioyê bû û di hilbijartinên ku 136 milyon kesan deng da, wî jî 146 hezar û 859 deng wergirt û bû Parlamenterê federal ê Brazîlê. Tecrubeya siyasî ya Romaryo tune ye, lê wî di dema kampanyaya xwe de ji ber ku xwuşka wî jî handicap e soz dabû ku ewê programên sporê ji bo handikapan têxe dewrê.



Romaryo ki ye?

Futbolîzê Brazîlî Romario bi saya rola wî ya mezin a Kûpa cîhanê di sala 1994an, Brazîl bû şampiyon. Di listeya FIFA yê de yek ji efsaneyên Futbolê ye. Her weha xwediyê " Pêlava zêrîn" û xwediyê 1000 golan e ku tenê çend forvet gihîştine vê hejmarê.

Muicîzeyên hinaran

Li gor lêkolînên zanîngeha "Edînburgha Îskoçyayê" her roj vexwarina ava hinaran ji bo helandina rûnên aliye pişta mirovan dermanekî herî baş e. Feydeyên hinaran yên din wiha ne :

- Ji bo xetimandina rehên



mirovan baş e.

- Mirovan ji pençeşêrê diparêze.

- Di hinarê de li dijî pençeşêrê antioksid hene . Radeya antioksidê ku di ava hinarê de heye, li gor ji şaraba sor , çaya kesk û ava portqalê 3 car zêdetir e.

- Weka merhem tê bikaranîn .

- Ne tenê fêkiya hinar, kulîlk dendik, av û qaçilkên hinaran dema ku bi hev re bînan kutandin di tibbê de weka merhem tê bikaranîn.

- Hêzeke mezin dide laş û dilê mirovan . bo zekemê baş e.

- Hinarên şêrîn hêzekî mezin dide zikê mirovan

- Ji bo kuxika mirovan baş e. Hinara şêrîn ji bo qirik û cêgeran re feydekî mezin dide.

- Ji bo goştê diranan "p" jî bifeydeye.

- Kulîlka hinaran birinan baş dike

Rojevakurd

